



Komunikadu Imprensa **21 Feveiru 2016**

JSMP Lansa Relatóriu kona-ba Situasaun Asisténsia Legál iha Timor-Leste

Iha 21 Feveiru 2017, JSMP liuhosi USAID nia projetu Mai Munisípiu, ne'ebé uluk hanaran Ba Distrito, lansa relatóriu temátika hosi peskiza ne'ebé JSMP halo, kona-ba situasaun asisténsia legál iha Timor-Leste, tantu asisténsia legál ne'ebé fornese husi Edifísiu Defensoria Públiku (EDP), no asisténsia ne'ebé oferese husi advogadu/a privadu sira.

Relatóriu ne'e ho titlu “**Situasaun Asisténsia Legál iha Timor-Leste**”, elabora no ezamina rekursu no kapasidade instituisaun Defensoria Públiku no advogadu/a privadu sira ne'ebé fornese servisu asisténsia legál ba comunidade no identifika dezafiu sira ne'ebé instituisaun hirak ne'e enfrenta.

Relatóriu ne'e no peskiza realiza liuhosi projetu Mai Munisípiu, ne'ebé hetan apoiu jenerozu hosi povu Amerikanu liuhosi Ajénsia Estadus Unidas ba Dezenvolvimentu Internasionál (USAID) no implementa husi Counterpart International.

Relatóriu ne'e identifika problema sériu kona-ba asesibilidade no kualidade asisténsia legál no afeita direitu sidadaun sira nia asesu ba servisu hirak ne'e. Aleinde relatóriu ne'e hatudu problema seluk kona-ba sistema selesaun, formasaun iha Sentru Formasaun Juridíka no Judisáriu (SFJJ), no ambitu formasaun no lingua iha sentru formasaun ne'e. Nune'e relatoriu ne'e subliña importansia nesesidade atu iha formasaun kontinuasaun no sustentável ba advogadu/a sira iha futuro.

“Relatóriu ne'e avalia situasaun real no dezafiu sira ne'ebé afeita ba direitu atu asesu ba justisa, no kualidade servisu asisténsia legál ne'ebé advogadu sira fornese. Tanba ne'e, deskobrementu sira ne'e importante atu serve hanesan referénsia ba instituisaun relevante sira atu hadi'a kualidade asisténsia legál atu aseguara direitu kona-ba julgamentu ida-ne'ebé justu,” dehan Diretór Ezekutívu JSMP, Sr. Luis Oliveira Sampaio.

Ema hotu iha direitu atu hetan asesu ba Tribunál no direitu ba asisténsia legál liuhosi advogadu/a sira. Direitu hirak ne'e, define iha ita nia Konstituisaun no projeta ona iha Governu nia dokumentu kona-ba Planeamentu Estratéjiku ba Setór Justisa. Tanba ne'e, Governu tenki fó importansia ba prezensa hosi servisu asisténsia legal sira hotu atu aseguara ema hotu asesu ba justisa, no garante kualidade sistema no rekursu ne'ebé adekuaudu ho halo servisu hirak ne'e ho kualidade.

Atualmente iha maisumenu iha deit advogadu-treinadu Timor-oan na'in 70 ne'ebé servisu ba organizasaun sira ne'ebé fornese asisténsia legál ho apoiu finanseiru husi doador estranjeiru ba período kurtu-prazu. Barak liu sira fó akonsellamentu no representasaun iha nivel luan kona-ba kestaun legál, maibé iha área jeográfika ida-ne'ebé limitadu. Iha Timor laran tomak eziste organizasaun la'ós-lukrutivu (*non-profit*) ida ho espesialista iha asisténsia legál ba feto no labarik vítima hosi violénsia ne'ebé bazeia ba jéneru.

“Asesu ba asistensia legal gratuita ba ema mukt sira maka fundamental ba sistema justisa ne'ebé nakloke ba ema hotu. Importante los katak governu Timor-Leste buka hetan dalan atu reforsa tan servisu importante ne'ebé Defensoria Públiku no advogadu privadu sira halo,” hateten Sra. Carolyn Tanner husi Counterpart International, xefe ekipa projetu Mai Munisípiu.



JSMP rekomena atu aumenta rekursu umanus iha EDP tanba ne'e la asesivel ba ema barak no la bele fornese assistensia legal ho kualidade aas; rekomena ba Governu atu asegura fundus sustentavel; diskuti no aprova imediata proposta Lei Ordem Advogadu; ho konsiderasaun formasaun ba advogadu/a privadu tenke iha Ordem Advogadu foun nia-okos duke iha Ministériu Justisa nia-okos; kontinua fo formasaun ho kualidade aas liu-liu kona-ba formasaun komprensivu ba abilidade legal hanesan preparasaun kazu, hakerek/elaborasaun no halo advokasia.

JSMP mós rekomena atu Ministériu Justisa tenke lidera projetu ida hodi hala'o peskiza regular no halo relatóriu ne'ebé halo mapamentu ba ezijénsia ba assisténsia legal no avalia servisu sira ne'ebé eziste. Tenke uza relatóriu sira nu'udar baze ida ba planeamentu no alokasaun orsamentu.

-remata-

Atu hetan informasaun kompletu, favor kontaktu:

Sr. Luis de Oliveira Sampaio

Diretór Ezekutivu, JSMP

Email: luis@jsmp.tl

USAID servisu hamutuk hanesan parseira ho governu Timor-Leste atu fó apoiu ba dezvoltamentu ne'ebé efetivu no baze alargada. Dezde 2001, USAID fornese ona assisténsia dezvoltamentu liuhusi milliaun \$318 ba Timor-Leste. USAID fó apoiu Timor-Leste liuhusi ninia esforsu atu harii liu tan nasaun ne'ebé prósperu, saudavel no demokrátiku liuhusi programa sira ne'ebé enkoraja kreximentu ekonomia ne'ebé sustentável espesialmente iha setór agrikultura; hodi hadi'a ema Timor-oan sira nia saúde, partikularmente fetu no labarik sira; no reforsa fundasaun boa governasaun- área tomak ne'ebé identifika ona iha Planu Dezvoltamentu Estratéjia Timor-Leste ba 2011-2030.

Counterpart Internacional maka organizasaun dezvoltamentu global ne'ebé haforsa ema no komidade atu implementa solusaun ne'ebé inovativu no di'ak ba dezafiu sosial, ekonomia no ambiente. Besik tinan 50, Counterpart halo parseiru ho komidade hodi rezolve nesiedade ba problema ne'ebé kompleksu relasiona ho dezvoltamentu ekonomiku, seguransa ai han no nutrisaun, no hari governasaun no instituisaun ne'ebé efetivu. Ho prezensa Counterpart iha nasaun hamutuk 25, lora-lora Counterpart serbisu hamutuk ho ema iha mundu tomak atu estabelese solusaun ne'ebé sustentavel atu fahe dezafiu ne'ebé iha. Ba informasaun liu tan vizita ami nia website: www.counterpart.org

Judicial System Monitoring Programme (JSMP) estabelese iha 28 Abril 2001 ho objetivu atu halo monitorizasaun kona-ba prosesu julgamentu iha Tribunál Ad Hoc Indonézia nian relasiona ho violasaun direitu umanu no Painél Espesial ba Krime Grave iha Timór Leste. Agora JSMP maka ONG prinsipal iha Timor-Leste ne'ebé monitóriza sistema justisa no halo advokasia ba legalidade, transparénsia, akuntabilidade no haforte estadu de dereitu. JSMP nia vizaun: siasidade demokrátiku ne'ebe garantia justisa no direitus umanus ba ema hotu. JSMP nia misaun: sei servisu ho espiritu kolaborativu hodi promove no proteje demokrasia, lei, justisa no direitu umanu liu husi monitorizasaun, edukasaun legal no advokasia.